

## La Bressola ganha contra Aliot en justícia: lum verda pel collègi-licèu immersiu a Perpignan

*La cort administrativa de Montpelhièr a decidit de suspendre la crompa del monastèri de Santa Clara ont la Bressola aviá previst son establiment*



[La Bressola](#)

Lum verd pel projècte de collègi e licèu immersiu en catalan a Perpignan. La justícia dona rason a la Bressola fàcia a la comuna governada per Louis Aliot. La Bressola aviá presentat un projècte de collègi e licèu immersiu en catalan dins lo monastèri de Santa Clara. Lo sit religiós aviá barrat sas pòrtas après 750 ans de preséncia e la Bressola aviá pagat 60 000 èuros per ne securizar la crompa. Pasmens, la municipalitat, dirigida per Louis Aliot e lo Recampament Nacional, [decidiguèt de far obstruccions a aquel projècte, en obtenent un drech de retractacion dels vendeires](#). La Bressola faguèt sa denúncia a la cort administrativa de Montpelhièr qu'ara a suspendut la crompa de la comuna.

Dins sa resolució, lo tribunal rebuta los arguments de la comuna contra lo projècte de la Bressola. L'executiu municipal lepenista assegurava qu'èra un risc d'installar un establiment educatiu dins una zòna amb risc d'inondacions e ont es present un cementèri, e mai justificava sa crompa del sit per de rasons de preservacion del patrimòni sens presentar cap de projècte.

Ara, la Bressola demanda a la comuna de Perpignan que retire son ensag de crompa e permeta que s'execute lo projècte de collègi e licèu.

Lo 23 d'octòbre passat, [qualques centenas de personas manifestèron per las carrièras de Perpignan](#) per exigir de la comuna qu'arrestèsse son "ataca dirècta contra lo catalan".

La Bressola a mai de 1000 escolans escolarizats en Catalonha Nòrd dins maitas escòlas mairalas e elementàrias e un collègi. Ara, per la dobertura d'un nòu collègi e licèu a Perpignan, se deu batre contra l'anticatalanisme de l'extrèma drecha que govèrna la vila.